

Minister di Finanza, FDA, DOW y BIC NV a firma acuerdo

Di dos fase embeyecimento Baby Beach ta cuminsa februari awo

Embeyecimento di Baby Beach, fase 2, ta cuminsa den e prome mita di februari. Esaki ta un proyecto cu ta cay bou di Ministerio di Turismo y a haya luz berde pa cuminsa unabes cu Minister di Finanzas di Aruba, Sr. Juan David Yrausquin a pone su firma riba e documentonan rekeri. Presente, diaran son mainta den Sala di Consejo di Minister na Bestuurskantoor tabata tambe representante di Bic NV. Sr. Anthony Thiel, di Bic NV ta e contratista local cu ta encarga su mes cu e proyecto aki y e ta premira cu e proyecto ta keda completa den e termino stipula. Sr. Thiel a gradici tanto Gobierno como FDA pa e confianza deposita den compania. E fase 2 di e embeyecimento ta core for di net pariba di e

cancha di tennis te na Santana di Cacho, pasando meymey di e matanan di druif pa por conserva mas tanto posibel e vegetacion existente.

E di dos fase di embeyecimento di Baby Beach, cu un costo di 1.7 milyon florin, ta wordo financia for di fondonan di Fondo Desaroyo Arubano (FDA) y ta un proyecto cu su prome fase a wordo realisa bou di Gabinete Mike Eman I. Henter e caretera y parkeo ta wordo construi por completo cu beton. Esaki tabata riba conseho di e ingenieronan di DOW, tumando na cuenta e efecto di erosion di awa salo, beton tin mas resistencia contra esaki cu asfalt. "Di e forma aki ta garantisar un caminda duradero," Thiel a expresa.

E trabounan ta premira pa

cuminsa rond di 11 di februari, ta encara construccion di caretera den beton cu fiber. E lo tin un looppad na ambos banda di caminda di klinkers, y muraya cu piedranan di calichi cu ta fungi como un separacion entre e caminda y e parti di e beach. Den e proyecto ta poni tambe construccion di un area pa deposita sushi, cual lo ta mas grandi cu esun actual cu ta bay wordo basha'abou.

E caminda di acceso pa e beach ta bay wordo embeyece cu tanto matanan di coco como di druif. Na momento cu e proyecto aki keda finalisa, rond di 10 di juli awor, San Nicolas ta keda cu un bunita atraccion tanto pa turista como localnan. "BIC lo percursa pa entrega un biaha mas un trabou cu lo wordo



realisa den e tempo stipula y cu e calidad cu ta wordo exige basa riba e normanan di DOW,"

director di BIC NV a duna di conoce.